



“NEE NED ZB 6TNN DEIBEDH SIEFI EBEEE SSIEI ESEE SEEE !!”.

La NASA a li à dadis fûr nome cumò **chestis fotos** fatis de sonde Mars Reconnaissance Orbiter tal mê di Març di chest an, e di bot si è discjadenade ogni sorte di fantasie su ce ch'al podarès volê dî chel scrit sculpît su la scusse dal planet Mart. Lant daûr dai plui azardôs chei ponts e liniis ch'a si viodin, no son altri che peraulis in alfabet Morse, une sorte di anunzi che i Marzians a nus mandin viers la Tière, ma dut ancjemò di capî, ch'al sarès:

“NEE NED ZB 6TNN DEIBEDH SIEFI EBEEE SSIEI ESEE SEEE !!”.

I scienzîats a son scuasi sigûrs ch'a son formis fatis dai grancj aiarons ch'a soflin sul planet, ma lis fantasiis a no si fermin mighe nome parcè che la sience e à cjatât il parcè, e inalore ju ducj a dî la lôr.

I plui esperts di storie antighe a so sigûrs che Mart, il diu de vuere pai Grêcs, al vedi dit:

“Chel bastart di Paride a i à metûts i cuars a Menelau, al à di murî”.

Là che invezit chei ch'a studiin i jeroglifics a disin ch'a nol pues jessi altri che:

“Cleopatre a i à metûts i cuars sedi a Juli Cesar sedi a Marc Antoni, bule jê”.

I plui modernis, cjalant a font lis fotos, a sostegnin che i segns a son une vore plui zovins e a rivin fintremai al dî di vuê, si che duncje un DEM di sinistre al dîs:

“La leç eletorâl e je une porcarie piês di chê di prime, covente mandâ a cjase chel ch'al à scrite”,

un altri tifôs de Nazionâl invezit al zure che:

“Pellè e Zaza a son stâts comprâts dai todescs che àn paiât i Cinês ch'a nus a i partin fûr des scjatulis”.

E chi al è plui che mai dificil metiju dacuardi ducj.

di Bepi Zefon